

## lis Gnovis

### MANIÀ. Magrèts cence difese

Sot dai vôi de Regjon, un blec di 70 mil metris cuadrâts, tal mieç de aree naturâl dai



Magrèts de Celine e de Midune, protezude dal sisteme europeu «Zsc/Zps», al periculu di jessi vendût. Cheste volontât e je stade pandude de Agenzie dal Demani, daspò che l'Esercit al à bandonât chê purizion di teritori sfrutât par agns e agnorums come «sclavitût militâr». I ambientalistis dal Friûl occidentâl a calcolin la brute gnove un vêr scandul. Par chel, intun comunicât firmât des 12 sociis dal «Forum des clapis ambientalistis», si pretint che la Regjon e decidi se operâ par une protezion positive de biodiversitât, garantint une fruizion di chescj ambients unics ancje tal avignî, o ben se bandonâ o disvinidri un blec par volte chest patrimoni, ch'al è fra chei plui prezios che il Friûl al svante e che l'Europe e invidie.

### ROME. Il cine dai Popui origjinaris

Di chê strade dal «Forum dai Popui natifs», ch'al à congregât «in streaming» Nazions di ogni bande dal mont, tai prins dis dal mês di Fevrâr, a son stâts programâts ancje la «Setemane native», dai 8 ai 12 di Fevrâr, e il «Festival dal cine dai popui autoctons». Tal lûc internet [www.ifad.org/fr/ipff/](http://www.ifad.org/fr/ipff/), a son proferîts ducj i apontaments de rassegne, cui leams eletronicis par rimirâ i cines sienzûts dai organizadôrs. Ancje Pape Francesc al à volût pandi la sô considerazion pal acjadiment, spedint un mes dulà ch'al marche che la solidaritât e je l'alternative vere al colonialisim dal di vuê.

### BRUSSEL. Decision inacetabil e incomprendibil

Ancje in Friûl cetancj di lôr a son restâts scaturîts pe decision de Comission europeane di lassâ colâ la petizion populâr «Minority SafePack», firmade di un milion e passe cent mil citadins europeus di ducj i Pais de Union, ch'a domandavin une protezion juridiche plui fuarte pai 50 milions di components des Nazions cence stât dal Continent. Lis protestis a son rivadis ancje in Consei regionâl, dulà che in mût uficiâl a àn pandût displasê e contrarietât i conseîrs Moretuzzo e Bidoli dal «Patto per l'Autonomia», Moretti in dite dal «Pd» e Bernardis pe «Lega», ch'al à invidât l'Assemblee di Triest a prontâ une «Mozion di censure».

### OCITANIE. La salut de marilenghe

Fra France e Catalogne, a son sù par jù 600 mil i europeus ch'a fevelin par ocitan. Il dât al è stât pandût dal «Ofici Public de la Lengua Occitana» che, vie pai prins mês dal 2020, al à realizât un grant scandai, tes regjons francesis Gnove Aquitanie e Ocitanie e te Val d'Aran, te Catalogne. Il studi al palese un peiorament de situazion, a pet dai dâts di 10 agns indaûr, stant che orepresint dome il 7% de popolazion a declarin di cjacará ocitan cence fastidi o avonde ben par quartâ indevant une conversazion normâl (cuntune diminuzion di 3-4 ponts). Tant e tant, il 43% dai Ocitans a declarin di capi la marilenghe e l'81% di lôr a domandin di svilupâ l'istruzion ocitane in dutis lis scuêlis. La plui part di lôr, po, a son persuadûts che lenghe e culture ocitane no si po separâlis.

Miercus 10	S. Scolastiche vergjine	Domenie 14	S. Valantin
Joibe 11	La Madone di Lourdes	Lunis 15	S. Faustin vescul
Vinars 12	S. Eulalie martare	Martars 16	S. Juliane vergjine
Sabide 13	S. Anselm di N. abât	Il timp	Cialchi neveade e frêt.



**Il soreli**  
Ai 10 al iève aes 7.17 e al va a mont aes 17.26.



**La lune**  
Ai 11 Lune gnove.

**Il proverbi**  
Si cognòs il valôr de salut co si è malâts.

**Lis voris dal mês**  
Se il teren nol è glaçât, al è pussibil plantâ salvie, tim, maiorane e rosmarin.

# Salût inant di Sanitât

Riforme necessarie, seont il Moviment «Prima la Comunitât»

«**D**evant dal fradi e de sôr te streme, Jesù al ufrîs un mût di puartâsi dal dut contrari di chel dal ipocrit. Al propon di fermâsi, di scoltâ, di fâ tele in mût sclet e personâl cun chel altri, di sintî empatie e comozion par lui o par jê, d'ingropâsi pal so patiment fin tal pont di viodi di lui e di tacâ a servîlu».

Cussì al resone Pape Francesc, tal mes prontât di chê strade de «Zornade mondiâl dal malât», ch'è cole ai 11 di Fevrâr. Ma, in zornade di vuê, esistial chel puest dulà che si fermisi dongje dal malât par scoltâlu, par diventâ compagns di vite, par comovisi cun lui e pal so dolôr, biel che si lu servîs? In face dai disastris causionâts de pandemie, la cuistion no tocje dome la cussience des personis o la sensibilitât di cualchi Comunitât, ma e rivuarde il mût di calcolâ la salut e l'organizazion dal sisteme ch'al à di atindi ai malâts. Une peraule fuarte e gnove, sun chest cantin, e su la necessitât di lâ di lâ di un'idee di Sanitât che no rive gran a dâi lis rispuestis necessariis a la bisugne universâl di salut e rive dal Moviment «Prima la Comunitât», ch'al è nassût par



Par curâ no bastin miedis, e vûl une Comunitât

Il concet di salut al va «desanitarizât» (bandonant une concezion economiciste) e calcolât come «benstâ globâl de persone e de Comunitât»

promovi une «idee di salut intindude come Ben comun» ([www.primalacomunita.it](http://www.primalacomunita.it)). De riflession inviade vie pal 2014 de Fondazione Santa Clelia Barbieri di Porretta Alto Reno Terme (Bologne) e de Fondazione Casa della carità «Angelo Abriani» di Milan e je nassude l'esperieence des «Cjasis de salut», parie cui valôrs e cui principis strucâts tal document fondatîf «Prima la Comunitât / Insieme per il benessere di ogni persona» dal 2019 e tal «apel par tornâ a partî cun cûr fuart», «Vogliamo un futuro per la nostra salute», dal 2020.

L'emergieence di Covid-19, seont la clape guidade di pre' Virginio Colmegna, e à di stiçâ lis istituzions a «meti in vore imprescj positîfs di partecipazion» e ducj i citadins «a fâ la part dal so dovê, te convinzion che la persone e je il centri de cure e che la salut al è un Ben comun fundamentâl, garantît de Costituzion».

Par no che i principis a restin cjacaris, «Prima la Comunitât» al domande investiments a pro dal teritori, par superâ «lis pecjis de assistance teritoriâl e domiciliâr»; un «coinvolziment reâl de Comunitât te definizion e te conduzion di un plan strategic pe costruzion sociâl de salut»; che nissun nol sedi escludût dal «Welfare», tignint cont dai «determinants sociâi di salut»; ch'a sedin valorizadis lis esperieencis inovativis des «Cjasis de salut» e des «Cjasis de Comunitât» te realizazion di une «salut di teritori gnove e fuarte», ch'è met in zornade la forme di organizazion des curis primariis e ch'è met tal prin puest la domiciliarietât e il «Welfare di Comunitât». Su l'esperieence di chestis gnovis «Cjasis», tant che «formis strukturadis di cure primarie integrade» e spiei di «projetualitât comunitarie», si cjacare tal document fondatîf dal Moviment, dulà che si ribat che la Sanitât no pues ocupâsi di bessole di salut.

Mario Zili

## Antighis presincis ebraichis in Aquilee

Il «Festival Viktor Ullmann 2020/21», ch'al presente ator pal mont concerti e convignis dedicâts a la musiche ebraiche «perseguitade» dal Nazisim e dal Fassisim, cul fin di profundî ancje lis lidris culturâls ebraichis da l'Europe, al proponarà un spazi su lis «Antighis presincis ebraichis tal teritori di Aquilee». L'iniziativa e je inmaneade dal Museu ebraic di Vignesie ([www.museoebraico.it](http://www.museoebraico.it)), che ai 18 di Fevrâr, al invidarà l'archeolic Massimo Lavarone par presentâ studis e ipotesis su la presince di une 'Sinigoghe te metropul de «Venetia et Histria», scune dal Cristianisim de Mitteleurope.

## Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», daprûf dal domo. Sabide ai 13 Fevrâr al cjantarà messe pre G. Gabassi. Radio Spazio e trasmet sul moment la liturgjie.

## Peraulis in dismentie par cure di Mario Martinis

### PENÇ

agg. = denso, spesso in riferimento ai liquidi (voce dotta dal latino *pinguis* "grasso")  
L'ingjustri al è masse penç e no si po scrivi: slungjilu cu la aghe.  
L'inchiostro è troppo spesso e non si può scrivere: allungalo con l'acqua.

### PETEÇ

s.m. = pettegolezza, ciancie da nulla (voce settentrionale di etimo incerto, deriva o dal verbo *petare*, con allusione al rumore sgradevole che si produce parlando in continuazione, nel senso di essere incontinenti nel parlare oppure quest'ultimo ha un posto secondario)  
Pardut là che e je stade e à puartât nome peteç.  
Ovunque sia andata ha portato solo pettegolezzi.

### PICÂ

v. = scalpellare la pietra, in generale battere con una punta, con martellina e simili; pungersi a parole (in senso metaforico) (voce d'origine onomatopeica)  
Bisugne picâ la glace ator la fontane.  
È necessario scalpellare il ghiaccio attorno alla fontana.

### PICJECJACIS

s.m. = clavicola (composto dalla forma verbale *picje* "attacca" e *cjasis* "ramaioli")  
Mi fâs mâl vicin dal picjecjacis.  
Mi fa male vicino alla clavicola.

### PICJOCE

s.f. = beccaccia (adattamento dall'italiano, o dal latino *tardo clocea*, a sua volta da *cochlea*, dal greco *kochliās* con intrusione di *pîpi* "pippione")  
Soresere la picjoce e svolte achî parsore par lâ tal palût.  
Al crepuscolo la beccaccia vola qui sopra per andare nella palude.